

La “Grotta” s’ha fatta ün bun nom

Il bilantsch davo ün mez on existenza cuntainta fich

(anr/mfo) La Grotta da cultura a Sent es gnüda inaugurada in october da l’on passà. Davo il prüm mez on d’existenza pon far ils respunsabels da la Grotta ün bilantsch positiv. Il böt da la chasa culturala da Sent vain accumul plainamaing.

In november dal 2005 ha gnü lö a Sent la „Conferenza dal futur“. In differents lavuratori sun gnüts elavurats progets per ün svilup dal cumün a lunga vista. Ün dals progets prevzaiva da realisar a Sent üna chasa culturala: üna chasa averta per minchün, ingio chi dessan pudair gnir realisats cuors, lavuratori, prelecziuns ed exposiziuns. Cha la Grotta da cultura dess però eir esser ün lö d’inscunter per star a plaz, per leger o discussiunar, d’eira gnü pretais da seis temp. Intant es la Grotta realisada ed ha pisserà per ün inrichimaint da la spüerta in cumün. “Nus eschan be stuts quant bain cha nossa Grotta funcziuna”, ha declarà Gian Albertini da Sent, il president da la Società Grotta da cultura Sent.

La Grotta nun es ün “lö per l’elita“

“La Grotta da cultura es ün lö ingio chi vain fat cultura ed ingio cha nus provain da coordinar eir ün pa la cultura chi’d es in cumün”, ha declarà Albertini. Cun „nus“ manaja’l la gruppa d’iniziants chi ha realisà il proget „Grotta da cultura“. Il nom „Grotta da cultura“ deriva dal local cha la società ha tut a fit daspö ils 1. avuost da l’on passà. Fin in october da quel on han lavurà ils iniziants da la Grotta vi da renovaziuns ed adattamaints dal local. “Per part vaina lavurà bod di e not”, ha dit il president da la società. Il resultat da la lavur voluntaria es quel cha la Grotta - la quala d’eira plü bod tanter oter üna pizzeria ed üna bar - as preschainta uossa in trais parts. Üna part serva sco local d’exposiziuns per indigens. “Quia po gnir expost tuot: Nossa Grotta nun es ün lö per l’elita, dimpersè ün lö per minchün“, ha’l accentuà. La seguonda part da La Grotta es reservada per concerts, prelecziuns, kino eui.. Il terz local es il lö d’inscunter ingio chi’s po baiver alch, leger o star da cumpagnia.

Lavur voluntaria – spaisas cuvernadas

Sco cha Albertini ha dit, es la partecipaziun dad indigens e giasts pro las differentas occurrenzias vaira buna. “I dà arrandschamaints chi nun interessan propa a tuots”, ha’l declarà. Chi detta però eir sairadas ingio cha la Grotta pudess esser dubel gronda. Eir las finanzas da la Società Grotta da cultura cuntaintan: “Fin uossa pudaina cuvernar ils cuosts da nossa Grotta cun las entradas dals singuls arrandschamaints”, ha’l dit. Ch’el spera natüralmaing cha quai funcziuna eir in avegnir uschea. Tenor el esa important da spordscher a la gliעד indigena ed a giasts ün lö d’inscunter sco la Grotta a Sent. “Per cha nossa Grotta possa survivor ed exister eir in avegnir lavuran quia tuots sün basa voluntaria”, ha’l declarà. “Da badair cha nossa sporta vain pedschada e ch’ella fa plaschier es indemnisaziun avuonda – anzi – nus vulain cuntinuar cun bler schlantsch e dalet”, ha’l conclüs.

La Grotta da cultura a Sent es averta mincha mardi e sonda da las 17.00 fin a las 21.00. Las occurrenzias vegnan publicadas e cumainzan pel plü a las 20.15. In quists cas es averta la porta da la Grotta da cultura a partir da las 19.00. Las plazzas sun limitadas. Reservaziuns pon gnir fattas pro Sent Turissem.

La Grotta da cultura accumul schischa seis dovair

(anr/mfo) Daspö cha la Grotta da cultura a Sent exista giöda ella ün bun nom. I’l local da cultura per indigens e giasts sun gnüts organisats d’urant il prüm mez on d’existenza arrandschamaints da tuot gener: I sun gnüts realisats cuors, lavuratori, prelecziuns ed exposiziuns. La Grotta da cultura es però eir ün lö d’inscunter per star a plaz. “Nossa Grotta nun es ün lö per l’elita“, ha declarà Gian Albertini, il president da la Società Grotta da cultura a Sent. Cha las portas sajan avertas per tuots e cha’ls respunsabels da la Grotta s’allegran da pudair bivgnantar eir in avegnir a pitschen e grond.